

ՍՈՎԵՏԱԿԱՆ ՄԻՈՒԹՅԱՆ ԵԿԵՂԵՑԻՆԵՐԻ
ՊԱՏԳԱՄԱՎՈՐՈՒԹՅԱՆ ԱՅՑԸ ԱՄՆ՝ ԳԵՐԱԳՈՒՅՆԻ
ՀԱՆԴԻՊՄԱՆ ԿԱՊԱՑՈՒԹՅԱՄԲ

1987 թվականի դեկտեմբերի 4—12-ը Միացյալ Նահանգների Քրիստոսի Եկեղեցու Ազգային Խորհրդի (ՔԵԱԽ) հրավերով ԱՄՆ-ում էր գտնվում Սովետական Միության Եկեղեցիների պատգամավորությունը: ՔԵԱԽ-ի ընդհանուր քարտուղար դոկ. Արի Բրաուների ուղարկած հրավերը առաջարկում էր Սովետական Միության և ԱՄՆ-ի Եկեղեցիների միասնական հիմնադրյալ աղոթք՝ այդ օրերին Վաշինգտոնում տեղի ունեցող Գերագույնի հանդիպման հաջողության համար:

Սովետական Միության Եկեղեցիների պատվիրակության կազմի մեջ էին. Ռուս Պրավոսլավ Եկեղեցուց՝ Պատրիարքարանի արտաքին գործերի բաժնի վարիչ՝ պատգամավորության ղեկավար, Մինսկի և Բելոռուսիայի միտրոպոլիտ Ֆիլարետը, Սերպուխովի եպիսկոպոս Կլիմենտը, իգումեն Նիկանդորը՝ Կովալենկո, ավագ սարկավագ Վլադիմիր Նազարկինը և թարգմանիչ Վ. Մախանը: Հայ Առաքելական Եկեղեցուց՝ Մայր Աթոռիս դիվանապետ գեր. Տ. Ներսես արքեպիսկոպոս Պոգապալյանը, Վրաց Պրավոսլավ Եկեղեցուց՝ Սուխումիի և Աբխազիայի միտրոպոլիտ Դավիթը, Լատվիայի Ավետարանական-Լուծերական Եկեղեցու արքեպիսկոպոս Էրիկ Մեստերսը և Էստոնիայի Ավետարանական-Լուծերական Եկեղեցու արքեպիսկոպոս Կունո Պալուան:

Դեկտեմբերի 5-ին Սովետական Միության Եկեղեցիների պատգամավորությունը աչքելեց Վաշինգտոնում ԱՄՆ-ի Եպիսկոպոսական Եկեղեցու Մայր տաճար, որտեղ

մասնակցեց գիշերային խոկումին: Հաջորդ օրը, ժամը 16-ին, Մայր տաճարում սկսվեց հանդիսավոր Էկումենիկ արարողությունը, որը գլխավորեց Վաշինգտոնի Եպիսկոպոսական Եկեղեցու եպիսկոպոս Ջոն Ուոքերը: Այս Էկումենիկ աղոթքին մասնակցեցին Սովետական Միության Եկեղեցիների պատգամավորության բոլոր անդամները: Հաջորդ օրերին Ազգային Մայր տաճարում ամեն օր աղոթքներ էին տեղի ունենում, որոնց մասնակցում էին մեկական ներկայացուցիչներ ԱՄՆ-ից և Սովետական Միությունից: Դեկտեմբերի 7-ին վերոհիշյալ տաճարի ժողովարաններից մեկում կայացավ մամուլի ասուլիս Ամերիկայի և արտասահմանի մամուլի ներկայացուցիչների համար, որին մասնակցեցին միտրոպոլիտ Ֆիլարետը, Ներսես արքեպս. Պոգապալյանը, միտրոպոլիտ Դավիթը, դոկ. Արի Բրաունը, ՔԵԱԽ-ի փոխնախագահ Ռենա Յոկան և Ջոան Կազիվարդան: Միտրոպոլիտ Ֆիլարետը և Արի Բրաունը ելույթ ունեցան թղթակիցների առջև, որտեղ ի մասնավորի հայտնեցին այն միասնական ուղերձի մասին, որն ուղարկվել է երկու պետությունների ղեկավարներին: Ինչպես հայտնի է, դեկտեմբերի 8-ին Ապիտակ Տանը տեղի ունեցավ միջին և մոտ տարածության հրթիռների վերացման պայմանագրի ստորագրումը Մ. Գորբաչովի և Ռ. Ռեյգանի կողմից: Սա պատմական աննախադեպ քայլ էր համաշխարհային խաղաղության ճանապարհին:

ԹՂԹԱԿԻՑ